

Shpjegim i "Libri i teuhidit" – 6

(E drejta e Allahut ndaj njerëzve)

Mësimet të mbajtura nga dijetari i njohur Salih Ibn Abdul Aziz Muhamed Ali Shejh

(Allahu e faltë atë, prindërit e tij dhe të gjithë muslimanët!)

Përkthyes: Bilbil Talla

Redaktor: Ilir Haxhiaj

Kapitulli: Shpjegimi i teuhidit dhe i dëshmisë "La ilahe il-Allah" (Nuk ka të adhuruar tjetër me të drejtë përveç Allahut)

Allahu i Lartësuar thotë:

"Vetë ata të cilëve idhujtarët u luten, kërkojnë t'i afrohen Zotit të tyre, madje edhe më të afërtit, duke shpresuar mëshirën e Tij dhe duke iu frikësuar dënimit të Tij. Vërtet që nga dënimi i Zotit tënd duhet të ruhet gjithkush."¹

"Kur Ibrahim i tha të atit dhe popullit të tij: "Unë i urrej dhe s'kam të bëj fare me ato që adhuroni ju në vend të Atij, që më ka krijuar dhe i Cili do të më udhëzojë në rrugën e drejtë" Ai e bëri këtë fjalë të përhershme te pasardhësit e tij, me qëllim që ata të kthehen (vazhdimisht tek Allahu)".²

"Në vend të Allahut, ata kanë zgjedhur për zot rabinët dhe murgjit e tyre, si dhe Mesian, të birin e Merjemes"³

"E, megjithatë, disa njerëz zgjedhin (për të adhuruar) në vend të Allahut (zota) të tjerë, (duke i konsideruar) si të barabartë me Atë dhe duke i dashur siç duhet Allahu. Por ata që besojnë, e duan shumë më tepër Allahun (sesa ç'i duan idhujtarët idhujt e tyre)."⁴

Në Sahihun e Muslimit; Profeti (Paqja e Allahut qoftë mbi të!) thotë:

"Kush thotë "La ilahe il-Allah" dhe mohon atë që adhurohet përveç Allahut, i mbrohet pasuria edhe gjaku i tij, kurse llogaria e tij është tek Allahu i Lartësuar."⁵

Shpjegimi i këtij kapitulli do të bëhet në kapitujt që pasojnë.

¹ Sure ISRA: 57.

² EZ-ZUHRUF: 26 – 28.

³ ET-TUBE:31

⁴ EI- EL-BEKARE:165.

⁵ Muslimi: 23.

Ky kapitull trajton çështjen më madhore dhe të rëndësishme: Shpjegimin e teuhidit dhe të dëshmisë “La ilahe il-Allah”. Këtë autori e bën nëpërmjet disa çështjeve të qarta, ndër të cilat:

1- Ajeti i sures Isra, i cili i kundërpërgjigjet idhujtarëve, për adhurimin dedikuar njerëzve të mirë. Ai qartëson se ky adhurim është shirk i madh.

2- Ajeti i sures Teube, i cili sqaron se pasuesit e Librit i konsideruan rabinët⁶ dhe murgjit⁷ e tyre si zota përveç Allahut. Ai bën të qartë se ata ishin të urdhëruar të adhuronin vetëm një Zot. Komentimi i këtij ajeti është i qartë dhe ka të bëjë me faktin se pasuesit e Librit vetëm sa u bindeshin dijetarëve dhe murgjve në kundërshtim me urdhërat e Allahut, pra, jo se u luteshin atyre.

3- Thënia e Ibrahimit (Paqja qoftë mbi të!) drejtuar mohuesve: “Unë i urrej dhe s’kam të bëj fare me ato të cilët adhuroni ju në vend të Atij, që më ka krijuar.”⁸ Nga mesi i të adhuruarve, ai përjashtoi Zotin e tij. Allahu i Lartësuar përmend se ky distancim dhe kjo armiqësi është shpjegimi i dëshmisë: “Ai e bëri këtë fjalë të përhershme te pasardhësit e tij, me qëllim që ata të kthehen (vazhdimisht tek Allahu).

4- Ajeti i sures Bekare, në lidhje me mohuesit, për të cilët Allahu i Lartësuar ka thënë: “Dhe ata s’kanë për të dalë kurrë nga Zjarri.”⁹ Aty Allahu thotë se idhujtarët i duan idhujt e tyre siç duan Allahun. Kjo tregon se ata e duan Allahun shumë, e megjithatë ata nuk konsiderohen muslimanë. E ç’mund të thuhet për atë që do vetëm idhujt dhe nuk do Allahun?

5- Thënia e Profetit (Paqja e Allahut qoftë mbi të!): “Kush thotë La ilahe il-Allah dhe mohon çdo gjë që adhurohet përveç Allahut, i mbrohet pasuria edhe jeta, kurse llogaria e tij është tek Allahu i Lartësuar.” Ky hadith është ndër argumentet më të mëdhenj që sqarojnë dëshminë "La ilahe il-Allah". Profeti (Paqja e Allahut qoftë mbi të!) nuk e lidhi mbrojtjen e gjakut dhe të pasurisë vetëm me shqiptimin e saj, as vetëm me njohjen e kuptimit të saj krahas shqiptimit, as pohimin e saj, as me faktin që lutjet i janë drejtuar vetëm Allahut, pa i shoqëruar tjetër kënd; por pasuria dhe jeta e njeriut mbrohen vetëm kur një person këtyre gjërave i bashkëngjijt edhe mohimin e gjithçkaje që adhurohet përveç Allahut të Lartësuar. Nëse dyshon ose nuk mban qëndrim, atëherë e humbet të drejtën e mbrojtjes së pasurisë dhe jetës së tij.

⁶ *Ahbar* - shumësi i *heber* - Janë dijetarët e jehudëve.

⁷ *Rahban* - shumësi i *rahib* - Adhures të krishterë (murgjit).

⁸ EZ-ZUHRUF: 26 – 28.

⁹ EL-BEKARE:167.

Sa çështje e madhe, sa e rëndësishme dhe sa e qartë! Sa argumente të pa kundërshtueshme nga kundërshtarët!